



Les Sages suivans l'Estoille sont venus d'Orient, pour adorer Iesus-Christ nouveau nay en la cité de Bethlehem.

QVAND donc Iesus fut nay en Bethlehem cité de Iudée, au temps du Roy Herodes, voicy venir des Sages d'Orient en Hierusalem, disans : Où est le Roy des Juifs, qui est nay ? car nous auons veu son Estoille en Orient, & sommes venus l'adorer. Or le Roy Herodes qui ouyt cela, fut troublé ; & ayant pris conseil des Sacrificateurs sur la naissance de Iesus-Christ, fit appeller en secret les Sages susdits, & s'enquit d'eux du temps que l'Estoille leur estoit apparüe, & les enuoya en Bethlehem, & leur dit : Allez, & vous enquestez diligemment du petit enfant, & quand vous l'aurez trouué, faites-le moy sçauoir, afin que i'y aille aussi, & que ie l'adore. Eux donc s'en allerent, & l'Estoille alloit deuant eux iusques à tant qu'elle s'arresta sur le lieu où l'enfant estoit, dont ils eurent grande ioye ; & estans entrez en la maison, ils trouuerent le petit enfant avec sa Mere Marie, & se iettans en terre l'adorerent, & apres auoir desployé leurs thresors, luy presenterent de l'or, de l'encens, & de la myrre, & estans aduertis diuinement par songe de ne retourner à Herodes, se retirerent par vn autre chemin en leur contrée.

Saint Matthieu Chap. 2.